



Aasiaat 29.juni 2017

Inatsisartut suleriaasianni § 37, imm. 1 naapertorlugu matumuuna Naalak-kersuisunut imaattumik apeqquteqaateqarpunga.

Apeqqutit:

- a. **Nipilersortartut eqqumiitsuliornermillu ingerlataqartut ukiumut akileraarutigisartagaat nunatta karsianut nakkartartut qanoq anertutigippat?**
- b. **Nipilersortartut eqqumiitsuliornermillu ingerlataqartut allat akileraartarnikkut oqilisaavigineqarsinnaanerat pillugu naalak-kersuisut qanoq pilersaaruteqarpap?**
- c. **Periuutsimmita qanoq ittut atorlugit nipilersortartut eqqumiitsuliornermillu ingerlataqartut allat akileraartarnikkut oqilisaavigineqarsinnaappat?**
 1. **Inuussutissarsiutigivillugu nipilersortartunut eqqumiitsuliornermillu ingerlataqartunut?**
 2. **Saniatigooralugu nipilersortartunut eqqumiitsuliornermillu ingerlataqartunut?**
- d. **Nipilersortartut eqqumiitsuliornermillu ingerlataqartut allat akileraartarnikkut 15 %-mut appaavigineqassagaluarpat nunatta karsianut tamanna qanoq naleqassagaluarpa?**
- e. **Inuussutissarsiutigalugu nipilersornermik eqqumiitsuliornermillu ingerlataqartut allat ukiumut isertitaat siulliit 200.000,-usut akileraarutigineqartannginnissaannik aaliangertoqassagaluarpat nunatta karsianut tamanna qanoq naleqassagaluarpa?**
- f. **Saniatigooralugu nipilersornermik eqqumiitsuliornermillu ingerlataqartut allat ukiumut isertitaat siulliit 50.000,-usut akileraarutigineqartarunnaassagalualuarpat nunatta karsianut tamanna qanoq naleqassagaluarpa?**
- g. **Apeqqutit qulaani pineqartut nunatta karsianut qanoq naleqarsinnaaneri nalilersorinnaajumallugit paasissutissat suut pisariaqarpap suullu amigaataappat? Qanoq iliornikkut paasissutissat tamakku misissorneqarsinnaappat katersorneqarsinnaappallu?**

(Inatsisartuni ilaasortat Peter Olsen, Inuit Ataqatigiit)

Tunngavilersuut:

Ullumikkut nunatsinni nipilersornermik, allatulluunniit eqqumiitsuliornermik inuussutissarsiuteqarniarneq ilungersunartumik ingerlavoq. Ilaatigut nunarsuarmiogatitsinnut allanut naleqqiulluta inukippallaarnera, pisisartullu amerlavallaanginnerput pissutaalluni.

Inuttut inuiattullu immitsinnut nassaarinialeruttornitta nalaani, namminiile-riartuinnarnittalu nalaani kulturikkut anersaakkullu nukittorsaqatigiittuarnis-sarput pisiariaqarluinnaqqissaarpoq.

Inuttut inuiattullu kulturikkut anersaakkullu nukittorsaqatigiinniarnitsinni nipil-ersortartortagut eqqumiitsuliortortagullu (filmiliortut, isiginnaartitsisartut, taal-liortut erinniortut, eqqumiitsuliortut allallu) pingaaruteqarluinnartumik inis-sisimapput.

Taakkoqangippat timikkut tarnikkullu nukittorsaqatigiillutalu sioariar-torsinnaanerput ajornakusoorluinnartussaavoq.

Taamattumik taakku ulluinnarni inuussutissarsiornikkut atugaasa sukut tama-tigut oqilisaavigineqarnissaat pingaaruteqarluinnartutut uanga isigaara.

Eqqumiitsuliortortartutsinnut ullumikkut akileraartarneq annertuallaarujussuar-poq. Akileraartarnerup annertuallaarnerata ilaatigut makku kingunerisimavai:

1. Nipilersortartunik eqqumiitsuliortunillu akissarsiakitsitsivallaarneq
2. Pisuni assigiinngitsuni pingaarutilinni aammalu soorlu qallunaatut festi-val-nik taaneqartartuni nipilersortartunik eqqumiitsuliortunillu nui-masunik atuisarnerup nangaassutigineqartarnera, pingaartumik illoqar-finni minnerusunik Nuup avataani.
3. Nipilersortartut eqqumiitsuliortullu akissaqartikkumallugit tusarnaarianut pisisartunullu akit qaffasippallaalertarnerujussuat.

Taamatut tunngavilersuuteqarlunga matumuuna apeqquteqaatiga ingerla-teqqippara.

Qinnutigissavara apeqqutigisakka ullut suliffeqarfiusut 10-t iluanni akileqa-ramaartut.